

陳州府志目錄

卷首

序

凡例

目錄

圖經

卷之一

沿革

有表

卷之二

星野

有圖

卷之三

疆域

卷之四

山川 附河渠津梁

卷之五

建置 城池 廨署 倉廩 坊巷 集鎮 通舖
郵政

卷之六

學校 附名宦諸祠

卷之七

聖蹟 附書院義學

卷之八

聖蹟

卷之九

祀典

卷之十

古蹟

附陵墓寺廟

卷之十一

風俗

附物產

卷之十二

賦役

卷之十三

職官

卷之十四

名宦

卷之十五

武備

卷之十六

選舉

卷之十七

人物
上

卷之十八

人物
下

卷之十九

忠義孝弟

卷之二十

流寓

隱逸

方伎

卷之二十一

列女

卷之二十二

列女

下

卷之二十三

仙釋

卷之二十四

藝文

一

詔勅

表奏

告文

虞書

序引

卷之二十五

藝文

二

記

卷之二十六

藝文

三

記

卷之二十七

藝文

四

贊頌銘

傳

論辯

疏引

題跋

祭文

碑銘

墓誌

賦

卷之二十八

藝文

五

詩

卷之二十九

藝文六 詩

卷之三十

雜志

祥異

兵變

外傳

幽異

陳州府志卷之十四

楚鄂崔應階吉升氏纂修

名宦

古之以循良書者代不數十人一郡一邑千百年往
往而絕豈循吏之果難歟史失之歟抑循分稱職無
赫赫功遂畧之耶陳之名宦可謂盛矣雖或事業未
必專在於陳然陳之人奔走祀事想像其遺澤意必
有隱結於民心而不可解者歟漢之吳公史無可書
之事治行卒爲天下第一何武常於去後見思章帝
亦謂安靜之吏歲計有餘然則長民者可徒以明察

威斷立聲譽耶志名宦

陳州府名宦

附郭淮寧縣

周司城貞子本宋大夫後入陳仕閔公爲上大夫孔子適陳主于其家賢足占云

漢申屠嘉梁人以材官蹶張從高帝積功爲淮陽守調內侯爲人廉直門不受私謁剛毅守節仕至丞相封故安侯

灌夫字仲儒潁陰侯灌嬰舍人校尉孟子也吳楚反夫以千人與父俱子血戰嘗陷堅遂死吳軍中夫奮與從奴十數騎馳入吳軍至吳將麾下殺數十人各聞天

下武辭以淮陽天下交勁兵處故徒夫爲淮陽太守
爲人剛直不好面諛貴戚諸有勢在已之右必凌之
諸士在已之左愈貧賤尤益敬稠人廣衆薦寵下輩
士以此多之

汲黯字長孺濮陽人也好學任氣節內行修潔好直諫
數犯主之顏色武帝嘗稱爲社稷臣仕至主爵都尉
右內史坐小法免官隱居田園數年會更五銖錢民
多盜鑄楚地尤甚武帝以淮陽楚地之郊召拜黯爲
淮陽太守黯曰臣自以爲填溝壑不復見陛下不意
陛下復收用之臣常有狗馬病力不能任郡事願爲

中郎出入禁闈補過拾遺臣之願也帝曰君得淮陽
耶吾今召君矣淮陽吏民不相得吾徒得君之重卧
而治之黠居郡清靜擇丞史任之責大指而已不苛
小多病卧閣內而淮陽政清後命以諸侯相秩居淮
陽七歲而卒帝以黠故官其弟及子葬陳東今有汲
塚云

韓延壽字長公燕人也少爲郡文學昭帝時以父義諫
燕王死擢諫大夫遷淮陽太守治甚有名徙潁川東
郡延壽爲吏上禮義好古教化所至必聘其賢士以
禮待用廣謀義納諫爭舉行喪讓財表孝弟有行修

治學宮習射御治城郭收賦租先定期會吏民敬畏
趨向之又置正五長相率以孝弟不得舍姦人其始
若煩後吏無追捕之苦民無箠楚之憂皆便安之接
待下吏恩施甚厚而約誓明或欺負之者痛自刻責
豈其負之何以至此吏聞者自傷悔後入爲左馮翊
蕭咸字仲東海蘭陵人太傅望之子也爲丞相史舉茂
才好時令遷淮陽內史張掖弘農河東太守所居有
政迹數增秩賜金後至大司農

岑彭字君然南陽棘陽人也從朱鮪定淮陽薦彭爲淮
陽都尉更始遣立威王張卬與將軍徭偉鎮淮陽偉

反擊走印彭擊偉破之後從光武帝累立顯功爲征南大將軍封舞陰侯

高慎字孝甫留人敦厚少華有沉深之量撫育孤兄子五人恩義甚篤仕爲陳國戶曹史思王鈞立多不法私行天子大射禮慎諫國相曰諸侯射豕天子射熊入爨六樽禮數不同昔季氏設朱干玉戚以舞大夏左傳曰唯名與器不可以假人奢僭之漸不可聽也後歷二縣令東萊太守老病歸草屋蓬戶甕缶無儲其妻謂曰君累經宰守積有年歲何能不少爲儲畜以遺子孫乎慎曰我以勤身清名爲之基以二千石

遺之不亦可乎

張歆襄國人涿郡太守况子也初以報讐逃亾後爲淮陽王相王新歸國賓客放縱干亂法禁歆將令尉入宮搜捕王白上左遷汲令

第五倫字伯魚京兆長陵人其先齊諸田徙充園陵宗族多故以次第爲氏倫少介然有義行建武二十七年舉孝廉補淮陽王醫工長隨王之國光武召見甚異之二十九年從王朝京師隨宮屬得會見帝問以政事倫因此酬對政道帝大悅明日復特召入與語至文帝戲倫曰聞卿爲吏笏婦公不過從兄飯寧有

之邪倫對曰臣三娶妻皆無父少遭饑亂實不敢妄
過人食帝大笑倫出有詔以爲扶夷長未到官追拜
會稽太守後爲司空奉公盡節以無私稱

韋義字季節京兆杜陵人少知名順帝時爲陳縣令政
甚有績官曹無事牢獄空虛數上書宜依古典考功
黜陟徵集名儒大定其制又譏切左右貶刺竇氏久
抑不遷以兄順喪去官比辟公府不就及卒吏民爲

義舉哀若喪考妣

以制禮實可哀

振堂也 振西也

邊韶字孝先陳留浚儀人也以文學知名教授數百人

桓帝時爲臨穎侯相徵拜大中大夫著作東觀再遷

北地太守入拜尚書令後爲陳相卒官著詩頌碑銘
書策凡十五篇

孔疇字元矩孔子裔也仕爲陳相漢桓帝立老子廟於
苦縣之賴鄉畫孔子像疇遂立孔子碑於像前至今
存焉

皇甫嵩字義真安定朝那人少有文武志介好詩書習
弓馬初舉孝廉茂才靈帝時黃巾賊作亂詔發天下
精兵博選將帥以嵩爲左中郎將持節與朱雋共發
精勇合四萬餘人討潁川黃巾進保長社賊波才引
大衆圍城嵩兵少軍中皆恐嵩曰兵有奇變不在衆

寡乃約勅軍士皆束苜乘城使銳士間出圍外縱火大呼城上舉燎應之嵩因鼓而奔其陣賊驚亂奔走會帝遣曹操將兵至嵩操雋合兵更戰大破之斬首數萬級嵩雋乘勝進討汝南陳國黃巾追波才於陽翟擊彭脫於西華並破之餘賊降散三鄉悉平百姓歌之曰天下大亂兮市爲墟母不保子兮妻失夫賴得皇甫兮復安居

駱俊字孝遠會稽人察孝廉補尚書郎擢拜陳相有威恩天下饑荒鄰郡人多歸就之後傾貲賑贍並得全活人有產子厚致米肉達府主意生男女者以駱爲

名袁術僭號求糧於陳俊拒絕之術使部曲將張闓私行到陳之俊所俊往從飲酒因詐殺俊一郡吏人哀號如喪父母

三國魏司馬孚晉宣帝懿次弟也溫厚廉讓博涉經史漢末喪亂與兄弟處危亾之中簞食瓢飲而披閱不倦性通恕以貞白自立未嘗有怨於人陳思王植有俊才清選官屬以孚爲文學掾植負才凌物孚每切諫初不合意後乃謝之泰始八年臨終遺令曰有魏貞士河內溫縣司馬孚字叔達不伊不周不夷不惠立身行道終始如一當以素棺單槨斂以時服卒年

九十三

南北朝魏李祥字元善趙郡人位中書博士時尙書韓元興率衆出青州以祥爲軍司畧地至陳汝淮北之人詣軍降者七千餘戶遷之兗豫之南置淮陽郡以撫之拜祥太守流人歸者萬餘家百姓安業

唐盧粲幽州范陽人始冠擢進士第神龍中累遷給事中武崇訓尙安樂公主及崇訓死詔墓視陵制粲固執以爲不宜主大怒出粲陳州刺史粲曰苟所論得行雖遠何憚開元初爲秘書少監累封固安縣侯終

鄒王傅諡曰景

李邕字太和揚州江都人少知名既冠謁李輪求圖秘
書未幾辭去嶠試問奧篇隱帙了辨如響嶠大嘆異
玄宗朝爲陳州刺史拯孤惜窮救乏期急家無私聚
帝封泰山還邕見帝汴州詔獻詞賦帝悅尋以讐冢
告邕贓貸枉法下獄當死許昌男子孔璋上書天子
邕得減死貶遵化尉妻溫氏表請戍邊自贖不省時
陳地北畫卦臺有張濟賢所撰碑邕磨去自爲文請
太子詹事張廷珪書勒廷珪工八分書與邕文並重
於時惜今不存

曲環陝州安邑人也少喜兵法資勇敢善騎射累官至

開府儀同三司封晉昌郡王權邠隴兵馬使擢邠隴
行營節度使李希烈陷汴州環守寧陵戰陳州斬賊
三萬五千級擒其將翟崇暉進檢校工部尚書兼陳
州刺史希烈平改陳許節度賜封三百戶二州比爲
寇衝民苦剽鹵客他縣環勤身節用寬賦斂簡條教
不三歲歸者襁負訓農治兵穀食豐衍轉檢校尚書
左僕射卒年七十四贈司空

薛珽字溫如河中寶鼎人以蔭累遷乾陵臺令以清白
聞課第一改昭應令人請立石紀德珽固讓遷楚州
刺史尋遷陳州建中初命使者分詣道察官吏而李

承狀珽之簡趙贊言其廉盧翰稱其肅書參聞於是拜中散大夫賜金紫累官太子賓客鎮嶺南卒贈工

部尙書

按唐書薛珽自楚州左授峽州未嘗爲陳州亦無陳州治行之語舊志不知何據第恐舊

唐書有之故存以俟考訂

劉昌字公明汴州開封人善騎射李希烈攻陳州昌從劉元佐以浙西三萬兵救之西去陳五十里昌薄其軍大戰破之擒賊將翟曜希烈奔還蔡州加檢校工部尙書累實封二百戶

孟元陽史失其何所人起陳許軍中以嚴整稱曲環領節度使時已爲大將使董作西華屯盛夏屨而立於

塗役休乃就舍故田輒歲稔而軍食常足環卒吳少
誠來寇元陽嬰城守圍甚急然終不能傳城韓全義
敗五樓列將多私去獨元陽與神策將蘇元策宣州
將王幹以所部屯澱水破賊二千詔拜陳州刺史憲
宗立遷河陽節度使

劉昌裔字光後太原陽曲人曲環領陳許軍累進營田
副使環卒上官浚知後務吳少誠引兵薄城浚欲遁
去昌裔止曰受詔而守死其職也况士馬完奮足支
賊若堅壁不戰七日賊氣必衰我以全制之可也浚

許諾賊攻堞壞不得修昌裔密造飛棚連柵卽募突

將千人鑿城以出擊賊走之北還柵已立守陴遂安
兵馬使安國寧謀應賊以計斬之賊聞解去以功擢
陳州刺史韓全義敗於澗水引軍走陳求入保昌裔
登陴揖曰天子命君討蔡何爲來陳且賊不敢至我
城下君其舍城外無恐明日從十餘騎持牛酒抵全
義營勞軍全義不自意迎拜歡服改陳許行軍司馬
明年爲節度使

李光顏字光遠累功兼御史大夫代洛二州刺史憲宗
討蔡以陳州刺史充忠武軍都知兵馬使擢節度使
詔以其軍獨當一面乃壁澗水破賊時曲裴度稱其

勇而義必立功遂拔凌雲柵屢破賊軍由是賊悉銳
士當光顏而李愬得乘虛入蔡賊平加檢校司空後
討李師道城鹽州逐吐蕃皆以忠武軍從加同中書
門下平章事歷邠寧鳳翔還鎮忠武李齊亂詔摠軍
出討朝受命暮卽戎翌日拔尉氏戰琵琶溝未陣薄
之賊走齊平進兼侍中敬宗初拜司徒寶曆二年卒

贈太尉諡曰忠光顏性忠義善撫士其下樂爲用故

常爲諸軍鋒

按唐自中葉藩鎮跋扈淮西之役觀望
養賊惟光顏忠勇特著始終一節且功

名著于陳許當入名宦無疑若謂其事業不專在陳
則名宦諸賢事業非必盡在陳也亟宜崇祀以昭曠

典忠武軍節度

卽陳許節度也

王沛許州許昌人累官陳許行軍司馬御史中丞從李
光顏討吳元濟破賊有功蔡平加兼大夫從敗吐蕃
以功擢寧州刺史徙陳州李齊之亂以忠武節度副
使討齊加檢校右散騎常侍進拜兗海沂密節度使
軍政大治以檢校工部尙書徙忠武卒贈尙書右僕
射子逢從父征伐有功武宗時討劉稹爲太原道行
營將領陳許兵七千屯翼城稹平加檢校右散騎常
侍後亦至忠武節度使云

高瑀冀州蓀人少沉遠喜詒書累遷陳蔡二州刺史入
爲太僕卿宰相裴度章處厚以瑀治陳蔡素有狀習

軍中情僞加檢校左散騎常侍領忠武節度使瑀寬和居官無赫然譽所至稱治士人懷之

石雄徐州人少爲牙將敢毅善戰氣蓋軍中以功除壁州刺史爲王智興所誣文宗素知其能不殺流白州徙爲陳州長史党項擾河西詔雄隸振武劉沔軍破羗有勞帝難智興久不擢會昌初回鶻入寇詔爲天德防禦副使累立顯功歷河中河陽鳳翔三鎮節度使

崔安潛字進之齊州全節人咸通中歷江西觀察忠武節度使乾符初王仙芝寇河南安潛募人增陴繕械

號令精明賊畏之不犯陳許境仕至太子太傅安濟於吏事尤長雖位將相關具獄未嘗不身聽之

五代晉陸思鐸澶州臨黃人也少事梁爲宣武軍卒以善射知名歸唐莊宗拜龍武右廂都指揮使晉高祖時爲陳蔡二州刺史卒年五十四思鐸在陳州有善政臨終戒其子曰陳人愛我我死則葬焉遂葬於陳州墓在城東北

劉審交字求益幽州文安人通於吏事晉高祖卽位擢爲右衛上將軍陳州防禦使出視民田見民耕器薄陋乃取河北耕器爲範爲民更鑄徙襄清二州皆有

善政終汝州防禦使乾祐三年卒四州人聚哭柩前
上疏乞留葬近郊得歲時祠祭詔特贈太尉起祠立
碑

周王明字如晦大名成安人周廣順中署陳州判官時
藥元福領防禦使會劉崇入寇元福將兵援之事多
吝於明先是州縣吏部送丁壯餉糧一夕丁夫盡遁
去元福怒欲盡戮之明入白元福曰今軍儲無闕丁
夫數萬人文吏懦不能制斬之何益不如寬以待之
賊敗凱旋公無專殺之名不亦善乎元福感悟盡免
其死

李穀字惟珍潁州汝陰人舉進士周祖西征爲西南
行營水陸轉運使關右平改陳州刺史以惠愛治民
會有內難急召赴闕倚以爲相淮陽吏民數千詣闕
請立生祠許之穀懇讓得止爲人厚重剛毅深沉雅
善譚論議政事能近取譬言多蒞理辭氣明暢尤好
汲引寒士多至顯位

宋田錫字表聖嘉州洪雅人第進士性好直言居諫職
極陳時務累官兵部員外郎端拱二年京畿大旱錫
上章陰陽失和調燮倒置上侵下之職而獨理未盡
下知上之失而規過未能帝及宰相皆不悅出知陳

州州民張矩殺里中王裕家兩人錫未嘗慮問裕家
人詣闕訴寃遣二朝士鞠之皆云非矩所殺裕家寃
甚其子福應募爲軍因得見上口臣非欲隸軍蓋家
寃求訴爾太宗怒付御史府治之寘矩於法二朝士
皆坐貶錫謫授海州團練副使召爲工部員外真宗
時仕至右諫議大夫史館修撰凡遇進見帝容色必
莊目之曰此吾汲黯也咸平六年冬病卒年六十四
遺表勸上以慈儉守位以清淨化人居安思危在治
思亂帝覽之惻然謂宰相李沆曰田錫直臣也朝廷
少有闕失方在思慮錫之章奏已至矣特贈工部侍

卽錄其二子並爲大理評事給俸終喪錫耿介其人
未嘗趨權貴之門居公庭危坐終日無懈容慕魏徵
李絳爲人以盡規獻替爲己任立朝以來章疏五十
有二以爲諫臣任職之常言苟獲從幸也豈可藏副

示後謗時賣直耶悉命焚之所著有咸平集五十卷

按田錫自是有宋名臣然在陳失察寃獄似未
可入此地名宦今仍存之不以一眚掩大德也

張詠字復之鄴之鄆城人少學擊劍慷慨任氣不拘小
節家貧客遊未始下人陳搏厚遇之語曰此人於名
利澹然無情達必爲公卿不達亦爲帝王師遊鄴下
與上谷寇準推轂引重登進士乙科累官工部尚書

進禮部抗論賊臣丁謂王欽若章三上出知陳州詠
在陳一日方食進奏報至乃丁謂逐準也且食且讀
既而抵案慟哭哭止復彈指罵晉久之卒年七十遺
表言不當造宮觀竭天下之財物傷生民之命此皆
賊臣丁謂誑惑陛下乞斬謂頭置國門以謝天下然
後斬詠頭置丁氏之門以謝謂帝嘆其忠贈右僕射
諡忠定葬於陳州宛邱縣孝弟鄉之謝村詠嘗言曰
事君者廉不言貧勤不言苦忠不言己效公不言己
能斯可以事君矣真宗嘗稱其材任將帥以疾不盡
其用自號乖崖以爲乖則違衆崖不利物有乖崖集

十卷

李維字仲方博學知名善屬文凡巡幸四方典章文物多所參定性寬易喜怒不見於色第進士累官工部尙書除柳州觀察使改知陳州卒贈尙書右僕射

呂夷簡字坦夫壽州人進士及第累官檢校太傅以使相判陳州歲中復相後以太尉致仕薨帝泣對群臣安得憂國忘身如若人者乎贈太師諡文靖

徐象賢字正臣滁之全椒人舉進士遷陳州司理時河決滑州陳守張耆多其材因見委署象賢竭力遵職無怠會宛邱巨盜八人逸捕不得縣避譴乃取他盜

掠服上府象賢一見知寃執不下守怒曰卽如是掾
欲何爲象賢曰願緩捕期當獲真盜卽不獲願獨坐
不敢枉民避譴己而大赦真盜詣府首守服其明表
薦之不報象賢剛方峭直不肯曲意干進蓋清白吏
云

晏殊字同叔撫州臨川人七歲能屬文景德初張知白
以神童薦之真宗召殊與進士千餘人並試廷中殊
神氣不懼援筆立成帝嘉賞賜同進士出身累官兵
部侍郎參知政事尋以禮部尙書知陳州慶曆中拜
集賢殿學士同平章事兼樞密使復以工部尙書知

陳州爲政敏而務以簡便其民未嘗爲子弟求恩澤
其在州時仁宗問宰相曰晏殊居外未嘗有所請其
亦有所欲也宰相以告公自爲表問起居而已在州
有和王校勘琪中夏東園詩闕西園自撰庭莎記且
與李少卿宗易稱最契史稱五代以來天下學廢興
之自殊始今猶有晏公祠

韓億字宗魏其先真定靈壽人徙開封之雍丘舉進士
知永城有治聲他邑訟有不決者郡守皇甫選輒屬
億治之通判陳州會河決治隄費萬計不賦民而辦
累遷尙書左丞致仕卒贈太子太保諡忠獻億性方

重治家嚴飭雖燕居未常有惰容見親舊之孤貧者常給其婚葬八子綱綜絳繹維績緯緝緇字子華舉進士甲科通判陳州累官司空檢校太尉致仕卒贈太傅諡獻肅

范仲淹字希文蘄州吳縣人舉進士第為廣德司理參軍論天下事奮不顧身天聖七年章獻太后將以冬至受朝天子率百官上壽仲淹曰奉親於內自有家人禮顧與百官同列南面而朝之不可為後世法且請太后還政不報改通判河中府徙陳州為政明敏通達決事如神時方建太乙宮及洪福院市材木陝

西仲淹言昭應壽甯天戒不遠今又修土木破民產
非所以順人心合天意也宜罷修寺觀減常歲市木
之數以蠲除積負又言恩倖多以內降除官非美政
事雖不行上以爲忠召爲右司諫

包拯字希仁廬州合肥人舉進士除大理評事歷官監
察御史知諫院立朝剛毅時陳饑朝命貴戚曹某往
監糶其人憑寵怙勢攬批糠培尅民苦不勝事聞賜
金牌命拯往廉之拯潛入陳城雜郡民中求糶忤豪
貴受羈因出金牌示之衆皆震慄正刑明禁立平糶
法豪貴伏誅民賴全活今永積倉乃其監糶處也有

司戶祝焉

查宋史本傳並無監糶陳州之事外戚曹氏皆小心端密累世安榮亦無怙寵得罪

遭彈劾者今世俗所指曹佾史稱其性和易美儀度通音律善奕射喜爲詩累官使相封濟陽郡王神宗嘗語大臣王雖近親貴幸而端拱寡過善自保真純臣也金牌等語荒誕不經此俚俗野人之談而學士大夫乃筆之志乘不可不辨

李仕衡字天均秦州成紀人後家京兆府進士及第累官尙書左丞以足疾改同州觀察使知陳州州大水築大隄以障水患徙潁州復知陳州

王德用字元輔趙州人年十七佐父超討李繼遷爲先鋒御軍嚴整歷侍衛親軍都虞侯章獻臨朝有求內

降補軍吏者德用不可仁宗奇之謂可大用知樞密

院事出知隨州後徙陳州累爲使相復拜樞密使卒
贈太尉中書令謚武恭德用本將家子習知軍中情
僞善以恩撫下多得士心名聞四裔閭閻婦豎皆呼
黑王相公云

狄青字漢臣汾州西河人善騎射寶元初趙元昊反以
青爲三班差使統兵擊之每臨敵披髮帶銅面出入
賊中皆披靡莫敢當累官宣徽南院使平蠻賊儂知
高拜樞密使嘉祐中加同中書門下平章事出判陳
州明年卒贈中書令謚武襄葬柳湖濱青爲人忼慨
尚節義有大慮謹密寡言外剛重靜鏡而內寬其計

事必審中機會而後發行師必正部伍營陣明賞罰
雖敵倖犯之無一士敢先者故所至輒有功與士卒
同寒饑勞苦而又分功於人未嘗自言雖古名將殆
無以過也

張方平字安道南京人少穎悟凡書一覽終身不再讀
舉茂才異等賢良方正累遷禮部尚書參知政事判
尚書都省請外知陳州陛辭極論新法并用師利害
曰民猶水也弗戒必覆舟兵猶火也弗戢必自焚帝
爲憮然慶卒亂京西轉運使令一路各會兵於州民
大驚駭方平持檄不下而奏之帝付樞密院頒下諸

路兵方散顧謂二府曰守臣不當爾耶吏方以苛刻
爲能小不中意輒置司推治一州至數獄追逮數千
里死者甚衆方平以事聞詔立條約下諸路時蘇轍
與王安石論新法不合出爲河南推官方平辟爲州
教授相與甚殷時諸路監司皆新進趨時興利長吏
初不預聞方平曰吾衰矣雅不能事蓋歸與以全所
志力請歸越四月復知陳州暇日坐西軒聞外版築
喧甚曰民築嘉應侯張太尉廟方平曰巢賊亂天下
趙鞅以孤城力戰保此州捍大患者也此而不祀張
侯何爲哉命夷其廟立趙侯祠未幾改南京入覲拜

宣徽北院使哲宗立加太子太保

吳奎字長文淮州北海人博聞強記于書無所不讀舉五經登第至大理丞策賢良方正入等擢太常博士通判陳州達于從政應事敏捷吏不敢欺豪猾畏歛治聲赫然入爲右司諫累官叅知政事

錢象先字資元蘇州人進士高第吳中無舊業聞陳州可居奉其母僦屋以居性介潔秋毫不以干於人陳人推重之遂卜築而家焉呂夷簡出鎮陳察象先行厚有經術薦以爲國子監直講改秘書省著作佐郎晏殊守陳辟簽鎮安軍節度判官皇祐中累遷龍

閣直學士久之出知陳州居亾何召還屢請補外再得陳州逾年復被召以吏部侍郎致仕卒年八十一葬宛丘縣友于鄉

魏琰字子浩以父恩授秘書省正字爲吏強敏名齊兄瓘嘗通判陳州適歲饑百姓相率強取人粟坐死者甚衆琰曰此迫於窮餓豈得已者坐其首黥之累官司農卿知江寧府

范鎮字景仁成都華陽人薛奎守蜀還朝曰得一偉人當以文學名世卽景仁也尋舉進士禮部奏名第一累遷集賢殿修撰翰林學士出知陳州陳方饑視事

三日擅發錢粟以貸監司繩急卽自劾詔原之是歲
大熟所貸悉還鎮與司馬光齊名人皆稱曰君實景
仁不敢有所軒輊云

鄭獬字毅夫安州安陸人少負俊才詞章豪雋峭整流
輩莫敢望皇祐五年帝御從政殿試圖丘象天地賦
進士第一前一日帝焚香祝曰願得忠孝狀元遂得
獬通判陳州入直集賢院累官翰林學士爲王安石
所惡出知杭州徙青州不忍見青苗之害遽引疾提
舉鴻慶宮卒家貧子弱藁殯僧屋十餘年滕甫爲安

州始塋

陳襄字述古侯官人舉進士調浦城簿攝令事累官知制誥直學士院爲王安石所擠出知陳州陳地蕪卑每遇霖雨無通溝州民苦之襄命修八字溝以渌水遂無泥行之阻偶州中屋瓦水文皆作鳥獸花木狀屬官請以爲瑞襄曰此非瑞也但有此異當奏以竹箒盛瓦數十片奏呈水文雖消痕迹猶在人以爲知大體州之學舍隘甚自范文正公爲倅有意恢闢數十年矣襄一朝以官舍廣之親入學與諸生講中庸州人始不務學至是踴躍自奮襄嘗釋奠學中童稚觀禮襄一以善言循循誘之莫不感勵平居存心以

講求民間利病爲急元豐初年卒友人劉彛視其篋
得手書累數十幅盈紙細書大抵皆民事也

傅堯俞字欽之濟源人十歲能爲文未冠登第嘉祐末
爲監察御史時乏國用言利者爭獻富國計堯俞惟
勸帝以自儉先天下無奪農時無害商旅徒欲紛更
爲之無益英宗卽位轉殿中侍御史所言悉中肯綮
直道不爲時所容數移官困於道路以龍圖閣待制
知陳州民饑用趙令時賑濟法賴以全活未幾復召
入累官中書侍郎卒哲宗與太皇太后臨哭后語輔
臣曰傅侍郎清直一節終始不變金玉君子也方倚

以相遽至是乎初堯俞自諫官補郡衆疑法令未安
者必有所不從堯俞一切遵之曰君子素其位而行
諫官有言責也郡知守法而已前守侵用公錢堯俞
爲償之司馬光謂邵雍曰清直勇之德人所難兼吾
於欽之見焉雍曰欽之清而不耀直而不激勇而能
溫是爲難爾

向經字審禮以蔭至虞部員外郎女爲神宗后進濰州
防禦使擢知陳州歲中閔囚活重辟三人西華令掠
人至死誣以族吏畏莫敢言經得其情窮治如法歲
大雪輒弛公私僦錢以寬民有司持不可經曰上使

我守陳民窮蓋我責我自爲此不爾累也方鎮別賜
公使錢例私以自奉去則盡入其餘經獨斤歸有司
供享勞賓客軍師之用

郝戴字伯牙石州定胡人家貧不妄受貸舉進士調宛
邱尉時年未五十以父樵老不第上書請致仕爲父
求官執政論使赴官而後請曰如是則可升朝籍遇
恩及親矣于是留妻子于家獨奉父行踰歲竟謝事
上官以其有治績固留之耆老拜庭遮道皆不能止
得太子中允以歸未至家而樵卒自畚土廬墓有助
之者使置土墓上去則遂撤之州以狀聞詔賜粟帛

治平末呂公著薦辟不就姻族語其妻聶氏使勸戴
仕曰吾不德無以助君子敢強所不欲以累其高哉
聶事舅姑亦以孝義著戴忠信自將篤行苦節不仕
而卒司馬光銘其墓

孫永字曼叔長社人十歲而孤擢進士第歷官端明殿
學士以疾辭提舉崇福宮踰年起知陳州永外和內
勁論議常持平不求詭異事或悖于理雖逼以勢亦
不爲屈與人交終身無怨讐范純仁蘇頌並稱之後
徙永昌哲宗立召拜工部尙書

安燾字厚卿開封人登第用歐陽修薦累官荆湖北路

轉運判官移使京東入見神宗偉其儀觀留檢正中
書孔目房修起居注直學士院兼知審刑院決滯訟
五百餘案求外遷龍圖閣直學士知陳州當新法行
吏或迎合求進司農符檄日夜下追胥苛切保任旁
午燾平心奉法列其泰甚於朝判軍器監累官知樞
密院事門下侍郎

范純仁字堯夫仲淹仲子也皇祐元年進士第調知武
進縣以遠親不赴易長葛又不往仲淹沒始出以著
作佐郎知襄城縣累官尚書右僕射兼中書侍郎章
惇既相純仁堅請去遂以左正議大夫知陳州會明

堂肆赦純仁上疏申理曰大防等當放還忤章愠意
詆爲同罪落職知隨州純仁性夷易寬簡不以聲色
加人誼之所在則挺然不少屈自布衣至宰相廉儉
如一所得俸賜皆以廣義莊前後任子恩多先疎族
嘗曰吾平生所學得之忠恕二字一生用不盡以至
立朝事君接待僚友親睦宗族未嘗須臾離此也有
文集五十卷行世

蘇轍字子由年十九與兄軾同登進士科又同策制舉
累官大名推官神宗召對延和殿時王安石方行新
法以書力言其不可安石怒出爲河南推官會張方

平知陳州辟爲教授是時朝廷以繇役溝洫事責成郡邑陳雖號少事而官吏奔走以不及爲憂轍獨以詩書諷議其間城西柳湖中有一阜轍築亭讀書於上至今名曰子由讀書臺郡人太常少卿李簡夫歸老於家轍間往與游唱和甚適焉

曾肇字子開舉進士歷官寶謨閣待制知陳州入爲吏部侍郎翰林學士兄布在相位引故事避禁職改龍圖閣學士復知陳州肇天資仁厚而容貌端嚴自少力學博覽經傳爲文溫潤有法居官多善政數以讜論規其兄士論歸之

楊仲元字舜明管城人第進士調宛丘簿民訴旱守拒
曰邑未嘗旱校吏導民而然仲元白之曰野無青草
公日宴黃堂宜不能知但一出郊可見矣校吏非他
實仲元也竟免其稅後歷知光虔虢三州官光祿卿
中散大夫入官五十年未嘗以私怒加人法有兩比
必傳輟典曰吾以是報國也卒年七十五

連庶字居錫安州應山人登進士調商水尉轉壽春令
興學尙文開瀕淮田千頃縣大治以母老乞監陳州
稅嘗送客出北門見冠蓋憧憧不已日西風急塵土
汚面慨然即日求歸與弟庠皆守道好修退居二十

年非其人不交非其義秋毫不可污也

孫思恭字彥先登州人擢第後爲宛邱令轉運使以水災時調春夫爭之弗得棄官去後以吳奎薦補國子直講累官天章閣待制性不忤物犯而不校篤於事上有所見必密疏以聞帝亦間訪以政云

胡宗愈字完夫舉進士元祐初歷給事中御史中丞哲宗嘗問朋黨之弊愈具君子無黨論以進於是諫議大夫王覲等合攻之罷爲資政殿學士知陳州州地勢卑下秋夏間大雨則諸河之水並由沙河蔡河同人潁河不能容受境內瀦爲陂澤宗愈議沙河入潁

河處有古八丈溝可開浚分蔡河之水自爲一支由
潁入淮詔羅某治之水患遂平後徙成都召還爲禮
部尙書遷吏部卒

陳竑字君度公琰之子元祐進士調鎮安軍節度推官
宛邱頻年水患因事條策守帥行之水患乃止及詔
修諸路祀典與瘞朽骨之無歸者皆足爲今取法

霍端友字仁仲常州武進人徽宗卽位策進士第一授
宣義郎歷大司成禮部侍郎端友言朝廷尊安重內
輕外可令內外待從更出迭入以奉禁闕殿大邦俾
天下之勢如持衡庶無首重尾輕之患疏入卽請補

郡乃以顯謨閣待制知陳州爲政以寬聞不立聲威
陳地汙下久雨則積潦時疏新河八百里而去淮尙
遠水不時洩端友請益開二百里徹於淮遂免水患
內侍石叢傳詔索瑞香花數十本端友疏罷之官至
通議大夫卒贈宣奉大夫

趙子崧字伯山燕懿王五世孫登崇寧五年進士第宣
和間官宗正少卿除徽猷閣直學士知淮寧府郭藥
師叛金師陷燕山子崧卽具奏乞留黃河春夫修城
衆笑之未幾虜至牟駝岡遊騎過咸平諸州大震獨
陳州方興版築兵士二萬餘人子崧又設三砦屯於

城外收士卒礪器械以示有備賊至仲舒岡去陳百
里而返

岳飛字鵬舉相州湯陰人少負氣節沉厚寡言家貧力
學尤好左氏春秋孫吳兵法生有神力未冠挽弓三
百斤弩八石應募屢破劇賊遷秉義郎留守宗澤大
奇之曰爾勇智才藝古良將不能過然好野戰非萬
全計因授以陣圖飛曰陣而後戰兵法之常運用之
妙存乎一心澤然其言薦補英州刺史賊王善圍陳
州飛戰于清河擒其將孫勝孫清以歸紹興十年兀
朮入東京知淮寧府李正民以城降飛遣將經畧淮

寧等郡部將張憲復淮寧府飛令統制趙秉淵知軍
辦事金人復圍淮寧趙秉淵棄城歸飛遣孫顯大破
金人於陳蔡界李山史貴韓直敗金人於淮寧此皆
其在陳之功也陳人立廟至今祀之

陳淬字君銳興化軍莆田人紹聖初補三班奉職累立
戰功建炎間擢知恩州王善擁兵十萬長驅兩河遂
襲恩淬與長子仲剛拒戰賊飛刃及淬仲剛以身蔽
父死之明年善復圍陳州淬大敗善兵拜宿州安撫
使後金人犯采石檄援建康金兵犯板橋諸軍皆潰
淬獨與戰勢窮力盡據胡牀大罵刃交於胷色不動

與從子仲敏俱死詔贈拱衛大夫明州觀察使官其一子一壻

翟汝文字公異潤州丹陽人第進士以親老不仕者十年擢議禮局編修官召對徽宗嘉之除秘書郎累遷起居郎皇太子就傅命汝文勸講有言汝文從蘇軾黃庭堅游不可當贊善任者出知陳州時張耒居宛邱素與蘇黃晁補之輩相善比投閑家益貧汝文雅重之欲爲買田耒不可乃止旣而召入累官翰林學士兼侍講除叅知政事同提舉修政局以乞治堂吏忤秦檜爲司諫方孟卿論罷自臨安歸過無錫愛其

山水因家焉汝文好古博雅精篆籀尤善畫有佛道
像及楚天春曉圖傳於世

元董守簡藁城人至正間爲汴梁路總管庭無留訟宛
邱有惡少爲里族害其黨乘衆怒殺之而誘其妻以
逃事覺有司坐族人死守簡閱牘曰惡少旣死妻安
在吏語塞乃捕其黨及所誘妻一訊俱服

明年富字大有鳳陽懷遠人第進士正統末爲河南左
轄時流民聚州境剽掠爲盜富撫定之悉籍爲民由
是境內肅然至今州邑聚落間稱年布政營者皆其
遺蹟也累官戶部尙書卒諡恭定

馮栢字良弼真定樂城人進士正德初累官按察僉事時河南守臣上言陳睢二州四通之郊盜所出沒且兵荒之後尤急彈壓請添設兵備憲臣部覆如議相方以前職需選遂命整飭睢陳等處兵備事駐陳州旣至肅清風紀發奸摘伏不受請託命所司修城隍練甲兵廣儲粟穀以備緩急盜息民安四境肅然先是二州衛所軍民雜居多不相能自設道後相復以諳練鎮之一時强悍震懼官民咸賴以安

初杲字啟昭湖廣潛江人正德辛巳進士嘉靖時爲侍御以爭大禮廷杖幾斃仍勅都御史席書驟轉禮書

儉黨側目督河東巉政商民尸祝焉尋遷河南僉事
分巡睢陳擒滅流賊王長子洪輔等數萬人中丞頤
以寧謚擢雲南憲副轉叅政致仕歸

林大春廣東潮陽人進士以僉憲駐節陳州政尚精明
振綱肅紀官屬屏息有豪從駕威陵人至莫敢攫春
執而訊之咸置于法威聲遠播鼠竊潛踪暇則興學
育才時勸講課謂孔子絃歌處存古遺當崇祀乃集
諸生以孔子生忌日各舉祀焉至今遵之其他飭武
備申鄉約諸治蹟在人口碑手書扁額筆法超絕亦
今人所難儷也陞浙江憲副督學

董文寀金吾衛人嘉靖己未進士歲乙丑以僉憲備兵于陳甫下車值郡大水堤潰憑城人心鼎沸文寀極力築塞復疏蔡河以分其勢民免昏墊歲饑僅發困爲糜以賑之全活者衆陳故多訟良懦數爲奸黨羅織文寀廉其尤者置於法興學校申警備繕城墉弭盜賊兩臺交章薦之尋有河藩少叅之命陳人立碑志思焉

徐卽登字獻和江西豐城人癸未進士初督學閩中尋擢觀察河南駐節於陳首申文教立思魯書院集諸生以時會講質疑問難務挾輿旨兩河士聞風皆自

相淬勵日進於學乃設田租以供會資至今取給焉
無何以論閩事調補本省叅知再過陳詣書院感憶
舊游情溢言表屬以大計聽處分會講如初毫無色
愠其養定可覘也所著有四書明宗錄論學要語天
中問答等集世多宗其說云

蕭雍直隸涇縣人庚辰進士以觀察使秉憲陳州爲政
持大體官民安之性慈祥而不事姑息衝虎社鼠必
重懲不少貸部有墨吏獾狼無狀當事者不敢問雍
首發其惡竟置於法雍向爲兩浙督學使者有重望
陳人士願得指南雍不憚折節日與講課評騭無倦

宦即著有民牧約言條中肯綮官斯土者多以爲法
程焉

蘇光泰山東濮州人己丑進士以汝南太守進憲副備
兵於陳郡有鉅惡盤據日久光泰廉知其狀立斃之
奸黨屏息時有楊思敬者陰蓄不軌當事頗憂之光
泰談笑令束手就擒尤愛士獎引不倦素以詞名主
盟東土結鞞來者甚衆光泰悉歡接然未嘗示以私
居二年加叅政服俸坐媒孽回籍士論惜之

趙可教四川温江人壬辰進士以管河憲副轉叅政整
飭睢陳二郡分隸軍衛官屬多不相能可教以雅道

鎮之武悍悉化部有權豪必痛抑不少縱至悍獨無告則優恤常過於仁亾何邁內艱去人咸思之

梁祖齡蜀之溫江人丙戌進士以右方伯特起爲睢陳兵備老成持重濟寬以嚴刁息笑釐吏習民安衛所有狡胄慣以私憤媒孽長官告許無已祖齡立剖而重懲之武弁肅然頃郡大水沙河衝突民田不下千頃祖齡委督疏塞堤防堅固數年來民免昏墊皆其賜也尋轉本省左轄開府兩河嚴禁惡宗蕩平礦盜茲不具載

劉恭獻陝西人洪武四年以秀才舉知陳州時兵戈方

息百姓流移田野未闢恭招撫安集均平稅役替年
民復業者五百餘戶田無荒蕪人得寧居遂建社學
立師範令民間子弟八歲入學課讀教養兼舉在任
四年卒民哀慕之

李子儀江西人洪武壬戌以秀才舉知州事躬勤儉敦
禮儀百姓化之時學校尙乏生徒子儀選子弟之俊
秀者入學課讀州地卑頻患水率民築堤以備其後
河雖間溢竟不爲災

陳价陝西南鄭人舉進士永樂癸卯知州事以德化民
政平訟簡以憂去民思慕之正統初服闋州民計期

叩闕請復任詔許之未至而卒州人思焉

張志道江南武進人貢入太學正統丁巳知州事蒞政
廉明教民耕織越二年蝗四起隣邑被灾者甚衆志
道徧禱於神蝗不入境歲仍大熟

萬宣江南當塗人領鄉薦景泰丙子知州事蒞政嚴明
約束吏胥無敢鳴張蠹民者時境內多盜捕得之悉
置于法一郡肅然部使者上其績詔旌異焉

戴昕直隸上海人領鄉薦天順間仕臨漳令有治聲擢
知陳州下車首興學校飾陵寢訪古蹟修葺而品題
焉爲治廉明仁恕百姓德之

朱祥字應和江南盱眙人舉於鄉成化間以青州司理擢知陳州祥勤明有爲仁慈撫下其修義陵新孔廟興庠校平徭役植桑棗障水患給民耕牛築明化堤建里甲營施藥恤革諸善政表表蓋一時賢守云

倪誥字汝制河間阜城人由舉人弘治庚戌知州事宅心仁恕處事明敏薄稅斂鋤積梗民安盜息吏舍行署增置一新聖殿號舍房並加修拓秩滿擢湖州府同知民爲立碑頌德焉

白思義山西平定州人弘治庚申知州事蒞政廉平輕賦減徭尤善釐剔弊蠹奸猾斂跡士民懷焉陳地下

歲苦水思義築堤爲禦復大濬其流民頽以免患屢
署庫樓學舍一新以至祭器神龕靡不潤飾治聲大
著監司交薦擢永州府同知

洪烝浙江平湖人辛未進士名動京師知陳州釐奸剔
蠹百廢俱興其調驛獎徵銀解衛郡至今稱便喜談
文訓課士子諄諄不倦癸酉丙子舉於鄉皆所識拔
云居六年以循良陞副駕部郎民攀卧遮留依依數
百里爲立祠尸祝之

王懋字德孺世家蕪湖甲子舉應天鄉試屢上春官不
第以銓試第一授湖州郡丞有異政尋爲郡人居

不獲者所中謫知陳州治先德化獎進文學示士子
嚮往士林翕然以爲得師歲禮斗米千錢爲發廩作
糜大疫爲設醫藥所全活甚衆巨豪某持吏短長所
不快立中以禍懋寘於法庚寅遷彰德丞丁內艱再
起補衛輝丞晉副北部郎尋慮囚北平所平反活人
四百有奇丁酉卒於京

楊堪性剛毅果於任事萬歷乙未以靈寶令擢知陳州
甫稅駕適河決立樓岡衝突民屠堪目擊其變隨糾
丁夫爲堵塞計而波濤洶湧勢難措手長跪水中移
時水平閭兩旬功告成閭民疾苦修河渠凡十餘道

陳雖卑濕稍得免水患堪力也。不避強禦犯者必寘於法。刁惡股栗。任滿擢蘇州府同知。民焚香泣送。遮不能行。建生祠以識思。堪山東禹城人。嘉靖辛酉貢士。

康應乾字一之。直隸雞澤人。嘉慶進士。知陳州。洞悉利弊。次第興除。獄訟剖決如流。浚河開荒。上當事八議。皆著爲法。程若兌軍及易侯馬。以軟拍尤爲便民。勤課諸生。文風丕變。擢南北部行。李蕭然畫書一擔而己。城北立有生祠。及去思碑。

湯師頊字啟英。其先桃源人。後以軍官調黔。遂爲貴陽。

人萬歷戊子舉於鄉典校粵西永福轉北成均擢察
兆別駕陞治中爲府尹所擠請守陳爲入渾厚慈祥
蒞政二載無束濕之罰而里甲不侵行戶不擾商習
民安守志耻奔競過賓駐節多不得其懽年未耆竟
解綬歸人咸惜之

王堯封字爾祝金壇人少負才名癸未成進士授戶部
主政晉員外郎中督稅監兌有廉能聲忤銓宰出知
南昌府尋謫貳陳州首肩志事開局延士徧搜藏書
逾年成帙惜未盡梓憫諸生寡昧捐家藏副本風郡
人購書共二千餘卷置學宮課士校藝甄品尤精後

復累官戶部郎中知思南府不就致仕生平亢直不合於時識者謂如大冬嚴霜百草萎死而松柏挺然獨秀云

鄭曜字叔昭其先高密人後徙邳州之宿遷曜本元進士嘗爲陳郡博以兵亂流離復徙於陳曜生平力學敦行博涉經史時甚重之洪武初仍辟郡博士不就與前翰林王逢吉友莫逆郡守李子儀賓禮焉郡人尙書古朴侍御孟鏞給事中張弼皆遊其門後學稱爲敬齋先生

盧勳字汝績州人博學邃經書洪武初辟舉在本州訓

導以身率人秩滿擢伴讀留藩邸教授遷秦府紀善
以直諫忤械送京師高祖釋之改江西訓導典福建
文衡預修永樂大典

馮莊甫蘇州人永樂初署州學正時承前元之後兵戈
始息草萊未闢學校未興莊甫以身挽之勸士興學
勤身謹禮諸士欣然奮起凡稱良師範者必以馮公
爲首

間調羨汝南新蔡人工古文辭擲管數千言倚馬可待
萬歷乙巳以孝廉秉陳鐸範士一閑於禮談經校藝
獎進後學孜孜不倦諸生有被侮者爲伸其抑間被

告訐則力白其寃故刁風息而士氣振性好客騷人
墨士座上嘗滿命酒賦詩輒有佳句直邇漢唐陳人
士爭傳誦之丁未成進士爲戶郎累遷山西憲副

趙師尹江西德安人庚子舉於鄉丁未署州學正性恬
澹作止端莊士入其範者莫敢踰教陳六年多以靜
攝潛修制義獨挾其奧暇則臨唐晉名帖癸丑登進
士授翰林編修

國朝孫建宗字毓祺山東歷城人崇禎癸未進士順治七
年蒞陳兵燹之餘城郭不完官署未修街巷生蓬蒿
民流離四方者尙未歸建宗移駐流通口離州二西

餘里各屬弗便力請駐陳乃設法招集各認己議
不進城者許貧戶認之永不退還於是向之逃竄
盡入城開店肆整牆垣樂室家矣至頂補虛差以蘇
民困製造鐵弓尺以定丈量地畝倥傯之際設立義
學勸民知禮樂書數其功皆不可泯也

子朋舉字念劬江南金壇進士由翰林檢討分巡睢陳
輯兵禁暴澤流隣邑惠及鰥寡捐金修黌序巡行窮
簷勸民力農桑數年間蒸蒸有起色公之力也

蔡含靈字子虛直隸寧晉人丙戌進士宰天台有政聲
擢起部督兩廠榷龍江海氛猖獗金陵倚爲保障壬

四州府志 卷之十四
寅由司空郎爲睢陳兵憲嘗自書屏右曰今日居官
愛民實有從井救人之意然惟本之以至誠出之以
婉巽上下自相諒也蒞任三載門無私謁甲辰署學
政驛傳兼署臬司守憲手不停批口不絕言目極觀
覽耳疲呼籲寢食靡暇憂勞成疾歿之日囊無私積
民輟耕罷市如喪考妣陳之紳士輸金以賻牧夫野
豎亦莫不束草尺綿易百錢助歸櫬焉

高民望三韓人蒞任之初兵亂甫定邑里蕭條田野荒
榛日夜憂勤多方安輯民旣復業乃修理城墉衙署
學宮神祠次第具舉知陳貧瘠苦於驛馬曰驛馬

解是有司事何煩苦百姓爲於是客至輒給以百錢
客有愧色民得安枕性寬和威怒不形而賞罰嚴明
獄無冤枉雖居官啖蔬衣布儉約如寒素甫兩期擢
南康知府陳民至今稱之

孫芳字馨如鑲白旗世族以正四品外轉知州廉潔勤
敏首革編審陋規八百餘金時正擬置墾荒官員及
安插閩兵各得其所民不擾害白蓮教煽亂妖言煩
興輒獲無遺境內肅然滇黔用兵迂道經陳傳言搶
掠民皆驚匿馳諭曰爾等勿懼有我在兵至芳嚴以
待之秋毫無犯尤惓惓於學校輸俸置義田七百餘

欽給讀書貧乏者鄉城設義學延師分教來學者優
待之免其差徭由是爭自濯磨文風丕振陳人肖像
祀之歌曰前有高公後有孫公以教以養遺惠無窮
歷陞鶴慶知府

李雲景福建晉江貢生由五河縣陞陳州凡七年興利
除害殫厥心力民爲立祠於高橋

蕭國弼遼陽生員以鎮平縣陞知州下車卽問民疾苦
豪強者鋤之柔善者撫之調兵治民文武和輯訟無
冤滯囊無餘貲早則築壇以禱甘霖立沛潦則令民
間家設火把一株隨設隨晴修陵廟崇學宮尊賢愛

士養老恤孤賑饑民開倉廩定里甲均賦役歷任大
載活民億萬竟以勞瘁卒于官

左峴字我菴浙江鄞縣人庚戌進士博學好古牧陳州
冰蘖自矢每月課士臨講堂諄復不倦時饑僅捐俸
煮粥生活者以萬計政尙寬厚黜繁苛民化於德刑
措不用有古循良風擢戶部員外郎

顧珽四川鹽亭舉人自蒼梧知縣擢知陳州值冰災死
亡逃散不可勝紀珽請於上發倉廩更廣爲設法賑
濟州治城堞遭水傾圮捐俸措辦修理募饑民厚給
其直全活尤多立義學延師分俸具館金惡棍瞎騾

馬老鼠眼等爲地方害按法治之人皆稱快三年卒於官囊無餘貲陳紳士經理其喪設奠痛哭觀歸泣送境上其得民如此

林貽熊廣東東莞舉人自臨穎知縣擢直隸陳州知州下車遇歲歉詳請緩征開倉賤糶民賴以甦居官清正遇事詳審性仁厚待人以寬民服其德甚於畏威常曰吾生平惟期大事化小有事化無若矜才逞智煩擾紛更非所以安民也陳地不足舊額制憲王檄改弓口按畝加增貽熊曰吾甯去官不爲陳民貽害事得寢值公出吏踈防盜越獄去罣誤解任陳人如

失慈母羈陳三年民競補薪米菜蔬奉之辭不受衆
置館而去及歸爲製錦屏萬民衣數十襲禁之弗能
止攀轅泣擁車爲不行其德政之所感深矣

丁文煥字存祿懷慶河內人順治丁酉舉於鄉秉鐸來
陳性簡靜學問淵涵志不在溫飽誨人無倦容所得
俸薪衣食外悉以具蔬食月會課二次成人小子多
有進益督修大成殿明倫堂植栢樹五十餘株躬自
灌溉七年卒於官

太康縣名宦

漢周磐字堅伯汝南安成人少遊京師學古文尙書洪

範五行左氏傳好禮有行非典謨不言諸儒宗之居
貧養母儉薄不充嘗誦詩至汝墳之卒章慨然而嘆
迺解韋帶就孝廉之舉和帝初拜謁者除任城長又
遷陽夏重合令歷三城皆有惠政焉後思母棄官還

鄉里

周磐縣志作劉盤蓋後漢書
劉般與磐同傳遂誤錄也

宋蔡高字君山莆田人景佑中進士爲長谿尉有媼二
子漁於海而亡媼指讐告縣縣吏難之曰海有風波
豈知不爲水死乎果爲仇殺若不得屍法不可理高
曰媼有寃色不可不爲理陰察仇家得其迹與媼期
曰吾與汝宿海上不得疑則爲媼受捕賊之責凡宿

七日海水浮二屍來驗之果殺也捕仇家伏罪民有
夫婦同出盜殺守舍子亟召里民畢會寰坐指一人
曰此殺人者果伏陸太康丞時開封尹吳遵路素剛
好以嚴憚下吏高年少不懼屈吳顧喜爲能越二年
病卒年二十有八妻程氏一男二女皆幼邑人哀其
貧以錢二百千爲贖程泣曰吾家以廉爲吏不可以
此汙吾夫卻不受高兄君謨爲館閣校勘得高遺稿
千數言皆當世之務踰年天子與大臣議天下事爲
條目大要於高之稿十得其五

吳擇仁興國永興人建中靖國初知縣境內多盜仁下

今日民窮而盜非天性也靜以鎮之使民衣食足盜自息矣若舊犯者弗貸群盜相戒不入境

明王辰太康知縣元末縣治露立百度草草黎元如晨星田野荒蕪竭力調劑拊循開辟經營建縣治一切制度皆所修舉

應百和知太康平賦均役勸課農桑務去民所疾苦作新士類建社學教子弟一時文風興起閭閻康阜有循吏風

方亨知太康純任德化有教無罰懇懇然務德和民一時境內有隆古氣象仁皇詔求賢良邑人顧端肅公

以亨闈陸吏部考功司員外

蔣奎廉謹持重治縣扶植善類進諸生勸課之均賦和
民仁厚平易時稱賢吏

崔敬鄆縣人廉直寬和加意學校以禮道民訟庭爲虛
拜監察御史直言遣戍起任湖廣叅政在縣之日奇
王生節妻以孫女後節舉於鄉授盤屋知縣距鄆六
十里相遇甚懽萬歷十八年節孫埏開府關中爲置
田供祀

王珣知太康公廉不受私謁民有兄弟訟者愀然不樂
曰骨肉何至此反覆解諭其人感泣遂以和睦先教

化緩刑罰循行古道不務聲名民思慕之

嚴鵬舉善伺奸頑勤於捕盜教子弟兵三十餘人嘗以黃昏單騎潛行鄉落遇偷輒捕賭博者就擒之出入人不能測銖鎰之奸無所容盜賊屏迹四境肅清

徐大經大度雄畧拊循學士大夫曲加恩禮修學置祭器盜息訟平民用和睦

雷沛性嚴令行疾如風雷縣境肅然盜賊屏迹黃河故道一切浚復各鄉置義倉儲粟萬餘石未幾大饑賴粟全活大水免昏墊人乃思其功德云

孫維城愷悌仁慈保民如嬰兒一塵不染明而不察和

而不流力行教化不事鞭朴愚頑格心庶幾無訟輒
近所僅見

林可成明敏通達遇事迎刃而解人不能欺於細微中
存大體不激不隨均徭定賦成不刊之令甲積弊釐
革遠矣

張國士清儉仁愛有古廉吏風雅重文學寬恤孤寡士
民敦德

李阜太康知縣才識疆敏時寇氛竊發設兵籌餉風聲
遠振強暴斂跡剏建磚城旬日告竣如出夙計人皆
驚服萬姓賴之

陽州府志 卷之十四 三
梁以樟字公狄庚辰進士下車之日盜賊充斥選練鄉
勇設五營帥長嚴立賞罰每聞警身自督率破巢對
敵數至克捷暇則談詩書獎拔士類調守商邱賊犯
歸德嬰城拒戰胆畧過人

劉黻太康教諭方學校初舉制度未詳黻身爲矩矱表
率士類師道旣立士風遂振

宋偉教諭太康持身端恪矩度詳明分俸給諸生之貧
乏設饌校藝寒暑不輟陞山東萊州府倅

國朝田六善字兼三山西陽城人丙戌進士順治四年知
太康縣應暹作新撫綏不倦諮籌長計四野皆有起

色與學作人愛民鋤暴得士庶心六載奏績擢去
胡三祝字北平奉天人康熙四年任才猷敏捷遇事敢
爲修學宮丈地畝居官四年行取擢御史

蘇楫汝字用濟廣東新會人順治辛丑進士寬雅尙文
愛民造士下車卽革除私項雜用錢糧設義學延名
師講經課藝康邑文教之興實自茲始在任七年陞
內院中書

張信字敬菴九江籍滿洲人存心仁恕政治修明戊午
大稔設法賑濟全活甚衆供給兵餉每隨時補掾以
寬民力廟舍古蹟多所修建陞光州知州

陳州府志 卷之二十一
楊士升字蓮菴湖廣黃陂縣貢生吏事精勤操履清儉
善撫字緩催科不事刑威而四境肅然蒞任未久因
父知開封府例回避去士民每歌思之

王景亮字伊仲奉天人由恩廕康熙二十三年在持已
端嚴敷政勤敏每歲親行郊野勤課農耕疏濬河道
申除運軍境內數被災力請蠲恤種種實政惠民孔
多在任六年卓異陞遼州知州人感其德立遺愛碑
吳本涵江南當塗縣貢生雍正十一年知太康撫良除
暴爲政嚴明奸棍蠹胥無不斂跡清查保甲地方寧
謐循行勸課務本重農康邑素不諳蚕桑捐俸買小

桑諭民種植四萬餘株教以養蠶之法創設書院延
師訓迪仍不時捐俸爲膏火資蒞任五年擢鄭州知
州

張冲太康主簿兵革之餘廬井甫定躬行郊野勞來安
集廉慎勤敏以佐邑令頗著事績

張汝霖太康典史精書算勤案牘一毫不染動必循理
有儒者氣象

孟瑀字尹玉新安人順治甲午舉人任太康教諭端重
有體不苟言笑教士敦實行以孝弟爲根本每與諸
生接輒爲指點聖賢心印所在歷九載疏薄自甘恬

淡寡營嘗曰師弟本朋友一倫若以利交便失雅道
不愧理學家風

司一京字含九壬子舉人篤實恬靜澹泊寡與課士以
敦行爲本論文必式先民秉鐸十一年引進後學多
所成就丁內艱去士有泣下者

扶溝縣名宦

漢王隆字文山馮翊雲陽人也避難河西爲竇融左護
軍建武中爲新汲令能文章所著詩賦銘書凡二十

六篇

宋程顥由進士歷官太常丞因彗星極論時事忤執政

出知扶溝治尙寬厚以教化爲先廣濟河由邑境瀕
河不逞之徒挾取舟人財貨間焚舟示威先生捕一
人令引其類得數人分地處之使挽舟爲業且以察
暴自是焚舟之患息民苦賦重歲有蠲除徃徃後輸
者免先生與之約是歲獲免者明歲必先輸惠澤始
均禾麥旱且枯教民掘井灌之饑歲請廩粟六千以
賑中官巡閱保甲所至侈供帳以悅之先生曰吾邑
貧安能效它令故青帳可用耳民有犯盜竊者先生
曰汝能改吾貸汝盜矢自新後復以盜犯捕吏及門
盜語其妻曰吾與大丞約今何面目見之自經死卒

以誠信不務苛刻會逸獄罷邑事百姓詣闕泣留不
得謫監汝州酒稅初先生至扶見地窪下患水欲經
畫溝洫未成又開設學校聚邑人子弟教之亦幾成
而去先生嘗曰百里之地至狹也道之興廢係焉是
數事皆未及成豈不有命與然知而不爲徒諉之命
則非矣先生常于座右書視民如傷以自儆謝上蔡
謂其用心如此必無濫刑處

金王浩剛介有執持政尙宜民嘗自諭曰爲臣以忠君
爲本爲政以愛民爲先時元兵攻縣奸民錢大亨納
欵於元遣所知勸浩降浩罵曰豈有忠臣肯降賊乎

司主簿劉坦典史宋乙死之暴屍於道歷春夏面色如生百姓追思之立祠

[明]張遵道洪武中以儒士授知縣蒞政廉勤兵燹之後邑里蕭然遵道開闢田野勸農興學招安流移百務一新後陞松江府同知

馬文炯持身廉謹撫下寬和專務德化不尚刑威民之奸惡者自勸流徙者自歸盜賊亦自屏息後陞刑部郎中

韓璟知扶溝究心民事調劑有方旱蝗不爲災修葺學校祠廟壇壝百廢俱興代去民立碑志思

陳紀治縣勸課農桑招撫流徙興學校築堤岸歲荒煮
粥食貧民吏卒在官各課以生業城市鄉村無遊惰
賴生殖者甚衆陞許州知州民立碑頌之

胡宣扶溝知縣治民事神修廢舉陞自廟學城池公解
葺理殆徧親爲規畫手書字額兼以題咏邑人立石
紀績

李增知扶溝敷政公平究心民隱築蔡河隄以防潰溢
開惠民支河分水勢其它均徭賦廣營建修邑乘有
則有章陞蘇州府同知

王廷華以輝邑學博擢知扶溝時流寇起河北廷華增

築城垣浚隍爲備正德七年春寇且至當道有懼之者懼彈丸不可守檄入行省治兵以他佐攝縣事廷華曰吾受命是邑職當死事却攝者勿來一意爲城守計甫三堞未完賊薄城下攻圍三日夜百方捍禦曲盡方畧用孤城抗數萬衆卒得保全以勞動卒百姓如喪考妣

黃紳知扶溝持身廉正敷政寬平民愛如父母遠近訟願就之理旣去民皆遮道泣留久而不忘

趙輔治扶抑強扶弱有應變才邑中藩府莊田困內豎徵擾輔白其事於監司繩之以法境內晏然雙泊河

歲泛溢力爲疏濬民永賴之

楊瞻知扶溝初拜命卽兼邑中大猾檄令繫獄比下車
定法令改服式獎耕織約文社嚴夜禁科條一布境
內肅然未幾以憂去雖被澤不終良法俱在繼治者
宗之

陳輅扶溝知縣清貞慈惠敷政詳明遠近疑獄多付裁
決嘉靖中稱治行第一後以不阿上官調去百姓惜
之

王喬年再試是邑年尙少馭下以嚴待士有禮深沉端
重罵詈不及臺隸事無巨細人無大小一識不忘時

有吏舞文民豪橫素爲止下例自者悉置於法邑境
晏然徵監察御史

管應鳳知扶溝舉動端凝政體嚴毅課士易舊習釐正
賦役較若畫一隣邑有決水嫁禍者力爭之得免優
調丹陽

全良範剛果敏捷綽有擔當邑累歲被水日夜拯救不
遺餘力訪求泛漲之故以雙泊淤塞排群議開疏堤
高河廣千年永賴于時兼攝太康濊惠并行兩邑士
民各立碑頌德扶有專祠

歐陽熙知扶溝潔守通才襟度濶洒折獄片言群羣立

解修城塹以壯金湯建倉廩以廣儲積時福藩括地
置王莊於境內照力爭之得免造士安民懲奸釐弊
不勞而政理擢南戶部郎邑人爲立祠勒石誌思

吳大田正德初署教諭事師範端嚴動靜不苟每講論
雖盛暑必衣冠危坐月試諸生親爲評品一時人材
稱盛尋陞興府伴讀世宗入繼大統仕至工部侍郎
胡伯涵以湖廣經魁署教諭事擇門下高等約文社日
譚經課菘如布素交攝縣事一介不取同考山東時
稱得人修葺學宮規制皆一新焉

國朝蕭讓博野歲貢生順治二年知扶溝綱習吏治視民

如子時草昧初開營頭張篤祐恣行無忌而張孔俱以
張鳳萬八等復爲之羽翼同惡相濟後雖投誠專殺
如故讓設法獲首賊數人餘寇驚竄士民始得安席
招流亡勸開墾通商惠工民漸復業因刑賊違當道
意被論去未竟厥施士論惜之

高錫爵字康侯奉天鑲白旗廕生知扶溝前後十年務
農勸墾招集流移時額餉孔棘民苦偏重爲更定賦
役不便於民者悉罷除之刁黠含沙影射人旣畏憚
縱恣益甚痛懲弗少貸其風頓息待士以禮導民節
儉蠲省雜賦勤恤商旅扶卹期季兵燹僦居民舍至

是始建衙署重修書院城郭橋梁百廢漸舉值軍興官吏身往辦理者其邑罷芻茭乃自鄭州至新野八百餘里風霜奔走扶邑遂免軍需士民歌頌紀其政事焉

劉嗣理全州舉人康熙四十六年蒞任渾厚精明案無留牘積訟數年片言而折刁健歛跡留心民瘼四十八年麥秋被水設法賑貸全活無算絕苞苴斥贅緣蒞任七年清風兩袖後竟以被論去然稱循良者皆首屈一指云

郁士超宜興人丙戌進士康熙五十四年蒞任悃愾無

華而利害所在奮不顧身鄙人盜鑿小北關放水
注扶之西南方爭得直卒議杜塞歲暮必招父老問
民疾苦在任五年民無冤抑後陞同知去

郭紹璞翼城人辛丑進士雍正二年知縣事學問淵博
吏治詳明會首報地畝惻然曰是扶人世世子孫害
我當以去就爭之盡焚所報冊籍竟任卒無成案惠
民蔡河力爲疏通深廣一律扶人賴之後調太康

西華縣名宦

漢戴封字平仲濟北剛人也舉孝廉光祿主事遭伯父
喪去官詔書求賢良方正直言之士有至行能消災

伏異者公卿郡守各舉一人郡及大司農俱舉封公
車徵陞見對策第一擢拜議郎遷西華令時汝潁有
蝗災獨不入西華界督郵行縣蝗忽大至督郵其日
卽去蝗亦頓除一境奇之其年大旱封禱請無獲乃
積薪坐其上以自焚火起而大雨暴至於是遠近嘆
服遷中山相後拜太常

明吳文郁知西華一意愛養均徭役節冗費教民以禮
日進諸生而訓之士端於庠農熙於野吏治蒸蒸一
時稱盛

陳嘉謨廉明有威望人不敢干以私興學校振風紀視

民疾苦如身受之小黃河沙河渚河等水恐爲民患
疏導隄防咸有成績爭者胥化幾無訟云

楊鳳知西華沉毅清正務節儉聽斷若神胥吏無所容
其奸催徵有法進諸生而課之民風士習一時丕變
劉文瑞勤慎有爲詳審而後發朱嘗疾言遽色毀淫祠
汰冗靡躬行節省鋤強植善時民間有均田之苦力
請於上得減地六千餘頃河流爲患疏濬五十餘里
皆其政績之尤著者

謝殿知西華博雅雅善體人情不侮鰥寡不長強禦
贖鍰羨餘之入若將免焉卒於官不能殮鄉士大夫

陽州府志
卷之四
三
賻以歸

尉在廷明達愼重操縱有方拒鄰境曲防之害力請於上幾以身殉百姓而不恤也既免昏墊均賦定徭至今賴之

屈煒知西華愷悌而練於事恢恢游刃一時稱神君慈母焉歲薦饑糒粥待流移隨鄉勸借計口授食全活甚衆

李日華字君實萬歷壬辰進士除九江推官降西華令和易安雅恬于仕進潔已奉公與閭閻休息邑中知名士若劉海鶴李間谷皆所藻鑑而敬禮之者錢牧

齋稱其書畫亞于玄宰博雅亞於損仲而徵兼二公
之長落落穆穆韻度頽然可謂名士矣治華三年刑
清政簡絃誦蔚起陞儀制郎

李興旺西華主簿當有明草創之初戮力興作邑中
切規制悉所經營位在下僚聲施後世

丁智西華訓導講明古學所立科條皆以身先之重德
行後文菽蠶蠶誘迪常若不足

胡乾完西華訓導多才藝工詩文持正不阿常攝沈邱
令以強項聞

楊一桂西華訓導耿介清潔學博理邃月爲三會評品

精確不輕與可士服藻鑑癸丑攝學篆縣發廩銀美
七兩盡散諸廩生後庫吏張世光以盜庫金論罪一
桂悽然曰此贓非盡乾沒乃誤出耳廩金之美可驗
也于是自捐俸七金以償之甲寅陞伊陽教諭逾九
十卒子其濂成崇禎庚辰進士

國朝武超凡字聖階滿洲人知西華諮達有度剛正有爲
受事於殘破之餘蒙者目之仆者立之強而有力者
鋤之豁虛地二千餘頃修學宮橋梁道路所在皆新
參苓之施遇及病民無筭邑人爲立祠勒碑志思焉
歸鴻字于磐康熙癸未進士將赴西華任前令徐樹唐

官臺中訪以政之所先徐告以華田下澤弭水患爲
亟鴻下車卽循眎境內疏清流河洩西北諸水程工
均徭刻期興役鄉愚難于慮始有蜚語撓工者鴻不
爲動程督益急不數月濬河九十餘里工甫竣而水
大至諸坡皆循河瀉沙向之屢歲不耕獲者稼穡盈
野始歌誦焉家業貧苞苴不行於暮夜興賢愛民刑
清政簡修學宮旌苦節闡純孝雅善臨池兼兩文敏
之長所書徧邑中至今寶藏比甘棠云

商水縣名宦

宋高若訥并州榆次人徙衛州及第歷遷太常博士知

商河縣故事職田牛種皆假於民若訥以爲擾甯廢

不耕楊偕薦爲監察御史裏行累官至樞密使

按宋史高

若訥知商河非商水也然恐有誤字姑存其舊容當別考

明孫元仁江南丹徒人洪武中爲縣丞以德惠民不尙

操切邑人張大兄弟爭田元仁諭以大義其人感激泣下相讓由是境內從化有親遜之風

龐壩四川南充人永樂初知縣事政尙質朴以興學校勸耕織爲務令民間無尙侈靡風淳俗美士民樂業未幾遷江寧累擢太常寺卿

劉漢湖廣麻城人正德初知縣事雅意愛民禮文學之

士流賊劉六七餘黨趙燧邢老虎等薄城雉壘卑削
漢以義激士民固守越二日賊從北門入漢與家人
皆自經未絕賊感其義釋而禮之倉庫無失事聞嘉
獎尋以病告歸民思慕之不忍忘後以孫貴贈兵部
尚書

楊一廉湖廣陵州人萬歷中知縣事爲政嚴明案無留
牘閭里悍賊者亟擊之一意佐良善盜賊屏息士民
樂業尋調繁江右百姓刻石頌德

國朝康起枚直隸滿城縣進士知商水性仁慈政尙寬簡
喜激勵後進公務之暇輒與諸生講學論文孜孜不

陳州府志 卷之十四
輟成就甚衆康熙二十八年大旱旱民食樹皮草掘
力請開倉賑濟設法安集嗷嗷衆口得免流離一時
熙然無不誦其仁愛焉

修映辰山東單縣人留心民瘼寬嚴得宜不以喜怒爲
好惡決獄多平反時進父老訪民間疾苦興利除害
商邑地勢窪下經水潦卽成澤國西南舊有穀汾二
水日久淤塞鳩工挑濬閱月而成上接華邑龍行溝
下至項城入潁東西亘百餘里兩岸遂成膏壤未幾
卓異以知州調知晉江縣邑人建祠祀之

吳耀浙江錢塘人由舉人知商水縣事姿性英爽決獄

平恕人不忍欺禁奸胥禮賢士鋤強撫弱蒞任未踰
月值黃河決水勢驟至周家口河北一帶悉被衝沒
沙河南岸危如累卵市人奔走號呼燿聞報單騎馳
視則濁浪排空長堤幾潰乃命盡拘客船排列南岸
防風浪衝擊旋鳩工數千人負土斬木填穴帮堤往
來指揮有進飲食請稍息者輒潛然出涕曰百萬生
靈在此一刻忍自安逸乎盡却之士民感泣修築益
力如是三晝夜始得保全邑人爲勒石曰吳公堤樹
柳以志之護城河堤舊卑薄雍正二年沙河決燿復
冒風雨沿堤奔走募賞修築水患旣平乃自董家歡

陝州府志 卷之十四
至華家河編置肆號不時幫修近城數十里永享其
利尋以治水方畧調補儀封

喬廷謨字祇承由拔貢除商水教諭謁 聖廟見其傾
圯卽倡議捐修煥然改觀著課士條規以躬行相切
勸士皆感勵時三十年無登賢書者廷謨嚴立月課
文風丕振自是科第接武素嚴正人不敢干以私講
會自備飲饌諸生或携資脯正色拒之遷歸德教授
以老謝去壽八十餘卒

李挺生商水訓導學有本源教士先孝弟後文章月課
紙筆飲饌皆捐俸自備諸生有貧者仍周之如是三

年士風天振未幾以年滿七十致仕去諸生依依不忍別有泣下者

項城縣名宦

漢雷義字仲公豫章鄱陽人也舉孝廉拜尚書侍郎有

同時郎坐事當居刑作義默自表取其罪以此論司寇同臺郎覺之委位自上乞贖義罪順帝詔皆除刑義歸舉茂才讓於陳重刺史不聽義遂佯狂被髮走不應命鄉里爲之語曰膠漆自謂堅不如雷與陳三府同時俱辟二人義遂爲守灌謁者使持節督郡國行風俗太守令長坐者凡七十人旋拜侍御史除南

頓令卒官

〔三國魏〕賈逵字梁道河東襄陵人也初爲絳邑長舉茂才除澠池令累官豫州刺史二千石以下阿縱不如法者皆舉奏免之帝曰逵真刺史矣布告天下當以豫州爲法外修軍旅內治民事過鄢汝造新陂又斷由溜長谿水造小弋陽陂又通運渠二百餘里所謂賈侯渠者也時孫權在東關當豫州南去江四百餘里是時州軍在項汝南弋陽諸郡守境而已逵移屯潁口陳攻取之計帝善之曹休夾石之敗徵逵軍幾無救卒諡曰肅侯豫州吏民追思之爲刻石立祠後

魏帝過項皆入達祠下詔褒美

縣志稱達令南頓以德化民爲之立祠今

按本傳未嘗令南頓蓋是時豫州治項故祀之而達在蹟亦得入項志也

宋

王代恕開封咸平人寬靜沉默好學善書歷陳州項

城簿會歲旱蝗州守風吏按田者言旱不爲災代恕力爭民得復乃已所在姦豪斂色屏氣相戒不可犯嘗曰使我爲令期年不獨善人不懼惡人可使惡人爲善人也左右承使有不如意未嘗笞責諸子問之則曰刑賞豈爲喜怒飾耶累遷吳江句容二縣令告歸卒

明黃福字如錫昌邑人由太學生洪武間任項簿公正

廉能民懷其政 邑豪善訟置之法良者安焉政日以
簡聲聞振達秩滿陞知龍江衛事後累官工部尙書
鎮交趾有功改戶部加少保卒成化時贈太保諡忠
宣

彭仲恭江西龍泉人永樂間知縣事勤敏有幹畧凡有
興作以重徭授富者而單戶則薄役政尙體裁左右
奉法而已時尙居舊縣黃河薦漲嚙城趾爲患孔亟
乞遷邑治未果九載滿致仕歸民思之不忍忘

宋麟直隸新城舉人弘治間任縣事愛民重農禮文學
之士悉薦享議移學宮卜城之中吉而麟疾矣竟卒

於官士民以考妣喪之

趙思忠太原舉人嘉靖間任項法施平省兩稅任民自以時賦而廉靜皎然不滓期月報內艱去

戚袞江南宣城選貢宗陽明良知之學謂政非勝吳立鄉約以化諭之取武桀者置於法借校舍生幕坐歌詩聲咏雍和累履問道彬彬如也旱禱大雨濡首直蹠壇下雨盆注俟霽乃起威廉明直緇非祀久之乞疾當途慰藉竟决志歸民扳卧躡道立祠志思云

魏勲山東臨朐進士爲政嚴明擊悍彘佑良善上官以爲能屢委節行它部中疋馬道食裁日用錢數十項

士空賢書盈一甲子肅期課作躬悉品訓士浸鼓起
是科登一人魁害歲疫與取秩金市白粲餌劑枵腹
染厲活者數萬盜苦民勒擒盡法除無遺比代行橐
書琴而已士民頌其德勒之石

王欽誥泰和舉人知項城雷動風厲民隱無不燭吏奸
無所容城池學校修舉廢墜一時多善政云

魏雲中山西進士方正廉潔爲政不事煩苛澹河築堤
飭兵造士多所建明行取兵曹民立生祠

楊新期陽城進士冷面霜操布袍蔬食項人至今稱其
清剛不阿墾荒招逃惠政不一民德之立生祠焉

徐可大密雲貢士勤敏有爲剔積弊革雜差裁收頭解戶俵京私幫走地等費百姓立祠頌德

田唯嘉饒陽進士材幹明敏局量寬大識者稱其才度有良相風陞任後項民感德肖像文昌閣祀之

方棟江南巢縣歲貢由黃巖訓導陞邑教諭以師道自持程正諸生有窘者儀問悉却之餘亦不濫受暇藝栢數十環內外垣迄今扶踈菁葱皆手澤也久之遷樊山教授士皆泣送伐石志明倫堂左云

國朝鄭羽侯字爾畏福建閩縣人順治壬辰進士甲午蒞項甫下車適河使者築金隄催柳甚亟羽侯念地瘠

陝州府志 卷之十四 五
兵燹後民方疲詣工所力爲請蠲得減柳稍萬餘束
視事二月案無留牘獄無罪囚慨邑事積弛勵精興
復修城濬池日出俸錢給工作里民趨事恐後旬日
報竣遂嚴譏察巷設柵門專人啟閉歲以爲常又修
葺文廟及魁樓進諸士課文藝丁酉得雋如韓如趙
皆平昔所賞識沿河植柳相戒勿剪以爲甘棠之遺
無何以勞得疾歲戊戌項罹水患猶踏災請卹冒衝
水氣疾甚部檄徵入銓司未至而卒君子惜之

黃陞字子納江南亳州人順治辛卯拔貢己亥令項知
項土磽瘠久罹寇虐軍興役繁終歲勤動不免凍餓

惻然曰是司牧者過也於是振綱飭紀徵兌自封投
櫃盡革耗羨獻決秉公獨斷捐俸課士積穀賑饑施
藥愈疾鹽政不以散里下夫役不以苦貧民城池學
廡文昌八蜡馬神之廟官吏房舍橋梁道路一切新
之建報應祠立義塚時上急報熟百頃可得紀錄陞
但多方勸墾聽民自報壬寅春晉蜀茂州牧老幼皆
泣下爲樹去思碑

顧芳宗字可亭江南上虞縣貢生懜悌愛民百廢俱舉
修學開渠建啟聖祠文昌閣捐俸置義學地三頃教
養並備邑人立碑建祠與明令田惟嘉合祀文昌閣

後

沈邱縣名宦

周聃季周文王第十一子食邑於沈傳至春秋見於經傳後爲蔡所滅

宋畢仲衍字夷仲初蔭陽翟主簿鋤惡長善登第調沈邱令歐陽修呂公著薦爲司農主簿累官終起居郎

明李琳定州人進士弘治十一年初設縣時來治縣事闢草萊建城郭凡官署學宮壇壝廛市分經析緯措置有方不傷財不病民百務贍舉政治一新諸逋負餘孽不敢遂其奸狡蔓延爲賊盜者日就約束論功

於沈邑稱鼻祖焉祀名宦

孫誠新河舉人繼二李之後城堞雖完土質不固建議包之以磚一時樓角海濠犁然悉備防守捍禦至今賴之

李宗元蘄水舉人嘉靖五年任爲政明敏案無停牘革弊除奸訟簡盜息修葺學宮及城隍廟置預備倉開漏澤園戒備戎器凡前令未及措行者一一修舉邑人德之

羅鳳翔字志曾山西蒲州舉人嘉靖四十三年任歸併陳頴寄庄詭地編審差徭時強賊白晝行劫設方就

擒民賴以安先年流賊之變以無外城賊得曩附而
上乃先築西門甕城三門得以續建任滿陞應天府
通判鄉人立祠肖像祀之初無嗣在任始舉一子妾
蘇出嫡馮妬幾不能育密選能撫者有義民王善政
偕妻田潛祿負其家哺之鳳翔去子方五月七歲與
群兒戲祠內一兒指像謂曰坐者爲誰詢之因曰汝
父羅令尹也歸語政夫婦遂以實對兒痛其母益感
義民延師以教十六擇王濟民女配之婚嫁盡禮萬
歷六年鳳翔卒於京子年十七有聞其事者白之太
司馬鑑川王公遺書河北周少叅密託鄉人訪之政

令其子出見十一年取回相持悲泣不忍去旣歸敗
名斗光習舉子業每念義民夫婦歲一再至義民始
亦無嗣後連舉二子一爲諸生人以爲撫孤食報云
馬思齊和州舉人隆慶六年任前令羅增西城棄思齊
周歷城垣遂增東南二甕均徭役逮鰥寡革弊釐奸
彰教宣化殫厥心力頌聲日起後聞訃去民立生祠
與羅並祀

宗五經夔陵人由歲貢任居官強毅遇事無所撓時有
陳州胥役將靈濟廟丁圮武盤地四百餘頃糧石飛
洒縣界沈民代辦數載無所訐邑生童原蘭劉棟以

告經慨然曰彼有地而無糧此有糧而無地吾民何
辜隨查西華靈濟廟旁有丁圮武盤子孫卽所洒地
主也上之撫軍委臨潁偃師二令會勘得其實糧復
歸陳南關外有河通商賈舟楫歲丁卯一旦徙而北
民弗便經徒步原野指湍汎處曰流可斷也遂築塞
焉淤出之田籍爲民利衆就地立祠肖像以祀其考
賦惠民勒有碑記

朱存德字維一辛未進士萬歷乙亥任爲人真實不苟
清白自持剔弊蠹省里甲均徭役廣儲畜濟溝渠修
城郭興學校重節義訟息民安歷任三年陞都水司

主事民思之爲建生祠

劉世光字豐津江南山陽舉人任英山教諭擢趙城令
丁內艱服闋補沈邱操履端方爲政寬嚴得體萬歷
癸巳大水傷稼民不聊生力請蠲賑設粥場數十處
全活者衆鄰郡盜起申請發遊擊兵同百戶達於海
擒獲大寇馮玉舉等九十餘名賊解散地方始寧有
吳生者貧甚親喪不能辦給穀數十斛命舉葬事建
社學立義倉濬溝渠舉廢祀任滿當遷輒乞休當事
交章薦留終弗從沈人立祠祀之

高毓秀字淑卿山東海豐人以舉人任沈邱令擊奸剔

弊臨左右不假顏色遇士大夫有禮自不敢干以私
早潦步禱靡弗應常單騎問民疾苦申文裁冗員立
條鞭規則革總催黜副役老人民便之力崇儉約暇
則課諸生文藝寒暑不輟沈自隆慶庚午歷五十餘
年門下士李如霖始中式考滿例當遷遽求休致民
追慕之

宋修對福建莆田人天啟丙寅以舉人任沈邱令居官
廉明除錢糧飛洒之病會項地有蓮橋清淨等坡遇
雨輒積水項人控上臺欲鑿河瀉之沈修對堅持不
可遂已沈民不爲波臣修對之力也

黎玉田字中函陝西乾州人進士授沈邱令府官英隴
不撓庚午賓典力請增科舉遺才用爲定額民有以
誘賂爲生計者動則蕩人產嚴禁之無敢犯觸陽城
大盜結連直省嘯聚劫掠當事飭捕罔授其鋒玉田
以密計單騎擒之餘黨潰散

柴懋掄字鹿柴陝西白河人以選拔任沈邱爲政英敏
諸弊一清流寇渡河懋掄擇民役壯健者立五營日
加訓練寇窺沈指授方畧摧其前鋒寇輒引去號爲
柴兵縣舊有南截河爲商民競利所阻傷地脈懋掄
情風鑑委生員盧中洪劉養靈等監督開濬不閱月

深澗如故學宮素缺鄉賢緣士請立祠申祀久曠之
典一旦肇興衆心允服

黃憲樂亭人由例貢萬歷間任沈邱主簿居官尙風力
能執持頗有清白譽民思慕之

蔣鵬山陰歲貢嘉靖中任沈邱教諭性質朴事上不苛
因謝夫馬中立不庸邑令稱賞旣退書聯衙舍云
義重邱山始不渝終不渝功名赴流水鏡不磨
驚令愈敬重焉傳聞當道禮遇優渥後人尊前不

國朝劉允謙字六吉壽州人丁亥

在沈

爲政英敏廉介不阿撫流民退荒土身履

利弊吏胥奉法惟謹沈士自天啟辛酉後科目寥落
允謙立社明倫堂條定規則親加筆劄提命諄復諸
生由是奮勵辛卯登籍者四中副車者三嗣後科不
乏人壬辰四月擢刑部主事沈人思慕爲立生祠

戴良佐順天人以廕授知沈邱清慎勤敏每東作出郊

省耕勤者勞以酒食一日之野見耘田盡婦女詢其

由知男子方會飲遂拘治之由是沈無惰農農隙督

令疏濬溝渠水患有備重文學重修文旨閣立義學

擇師啟廸暇輒往視並察邑境塾師荒陋者斥之子

弟咸以冊記時爲稽考惰業者令父兄嚴教焉康熙

十九年王提督領兵南下掠民間牲畜衣物鄰邑大受其害良佐白督立時鎖禁秋毫無犯太和亦借其力得免在任八年陞太常博士邑人立祠祀之

郭金壁江南人由監生知沈邱縣沉毅有謀畧寬嚴並濟邑有巨惡劉暴爲邑大害斃諸獄人共快之囚有無辜繫數十年者慨然釋之計其女髻齡被禁釋時已三十餘歲矣聽訟無鉅細必平允民稱無冤四境溝洫躬親疏濬建闕帝廟於宛邱寺西遂爲今春秋致祭定所復設義學延明師加意鼓勵文風一振在任四年卒於官

劉謙江都人由舉人試用沈邱勤敏無留事時賭風甚熾無賴多酗酒毆良善皆嚴禁莫敢犯晝視事夜必出巡邑人善惡纖微皆知之人服其神州牧每以他邑事諮決焉城倉祠宇廢墜者皆所修建在任四年政績頗著以能調繁封邱邑人爲立生祠

陳州府志卷之十四終